

Advokatska-odvjetnička komora Federacije Bosne i Hercegovine
REGIONALNA ADVOKATSKA-ODVJETNIČKA KOMORA TUZLA



PRAVILNIK
o Fondu solidarnosti advokata, advokatskih pripravnika,
advokatskih stručnih saradnika i radnika
Regionalne advokatske-odvjetničke komore Tuzla

Tuzla, 21.09.2021 godine.

Na osnovu Zakona o advokaturi Federacije Bosne i Hercegovine, Statuta Regionalne advokatske-odvjetničke Komore Tuzla i na osnovu zaključaka Skupštine Regionalne advokatske-odvjetničke komore Tuzla održane dana 07.07.2021 godine, Upravni odbor Regionalne advokatske-odvjetničke komore na svojoj sjednici održanoj u Tuzli dana 21.09.2021. godine donosi:

PRAVILNIK
o Fondu solidarnosti advokata, advokatskih pripravnika, advokatskih
stručnih saradnika i radnika Regionalne advokatske-odvjetničke komore
Tuzla

I OPĆE ODREDBE

Član 1.

U cilju pomoći advokatima, advokatskim pripravnicima, advokatskim stručnim saradnicima i radnicima u Regionalnoj advokatskoj-odvjetničkoj komori Tuzla (u daljem tekstu RAKTZ) na temelju uzajamnosti i solidarnosti ovim Pravilnikom uređuju se način i uslovi osnivanja Fonda solidarnosti advokata, advokatskih pripravnika, advokatskih stručnih saradnika i radnika u RAKTZ (u daljem tekstu Fond solidarnosti), visina obaveznog članskog doprinosa, način pribavljanja i upotrebe prikupljenih novčanih sredstava Fonda solidarnosti, postupak za ostvarivanje prava na korištenje sredstava Fonda od strane njegovih članova.

Ovim Pravilnikom propisuju se kriterijumi i uvjeti koje članovi moraju ispuniti da bi imali pravo na korištenje sredstava Fonda, ovlaštenja za dodjeljivanje pomoći kao i druga pitanja koja se odnose na rad Fonda

Član 2.

Fond solidarnosti je Fond za posebne namjene, čija se sredstva koriste za pružanje pomoći advokatima, advokatskim pripravnicima, advokatskim stručnim saradnicima i radnicima u RAKTZ i to u slučaju bolesti ili u slučaju smrti advokata, advokatskog pripravnika, advokatskog stručnog saradnika, članova RAKTZ, i radnika u RAKTZ.

Član 3.

Svi advokati, advokatski pripravnici, advokatski stručni saradnici i radnici u RAKTZ imaju jednaka prava u pogledu raspolaganja i korištenja sredstava Fonda pod uvjetima utvrđenim ovim Pravilnikom.

II ČLANSTVO U FONDU

Član 4.

Članstvo u Fondu solidarnosti je obavezno.

Član 5.

Svojstvo člana Fonda solidarnosti advokat stiče danom upisa u Imenik advokata, advokatski pripravnik danom upisa u Imenik advokatskih pripravnika a advokatski stručni saradnik danom upisa u Imenik stručni saradnika, koji se vode kod Advokatske-odvjetničke komore Federacije Bosne i Hercegovine. Radnici stiču svojstvo Fonda sa danom zaključenja ugovora o radu na neodređeno vrijeme sa Regionalnom advokatskom-odvjetničkom komorom Tuzla

Član 6.

Članstvo u Fondu solidarnosti članovima prestaje u sljedećim slučajevima;

1. ukoliko advokatu, advokatskom pripravniku ili advokatskom stručnom saradniku, prestane svojstvo advokata, advokatskog pripravnika, odnosno svojstvo advokatskog stručnog saradnika. Radniku članstvo u Fondu prestaje prestankom radnog odnosa u RAKTZ,
2. usljed smrti člana Fonda solidarnosti,
3. usljed prestanka rada Fonda solidarnost.

Član 7.

Advokatu prestaje članstvo u Fondu solidarnosti prestankom članstva u RAKTZ odnosno na dan kada je advokat prestao sa radom ili izmjestio sjedište svoje advokatske kancelarije van područja RAKTZ,

Advokatskom pripravniku prestaje članstvo u Fondu solidarnosti ako je izgubio svojstvo advokatskog pripravnika ili ako je prestao sa radom kod principala čije je sjedište na području RAKTZ.

Advokatskom stručnom saradniku prestaje članstvo u Fondu solidarnosti ako je izgubio svojstvo stručnog saradnika ili ako je prestao sa radom u advokatskoj kancelariji čije je sjedište na području RAKTZ.

Radnicima prestaje svojstvo člana Fonda solidarnostiprestankom radnog odnosa u RAKTZ.

Član 8.

Članstvo u Fondu solidarnosti prestaje smrću člana Fonda-danom kada je smrt nastupila.

Član 9.

Odluku o prestanka rada Fonda donosi Skupština RAKTZ.

U slučaju prestanka rada Fonda solidarnosti, prestaje i članstvo i svim njegovim članovima.

U slučaju prestanka rada Fonda solidarnosti, sva novčana sredstva koja se zateknu na posebnom računu Fonda postaju vlasništvo isključivo RAKTZ i takvim sredstvima je moguće dalje raspolagati u skladu sa uslovima pod kojim se raspolaže i ostalim sredstvima RAKTZ.

III SREDSTVA FONDA SOLIDARNOSTI

Član 10.

Sredstva Fonda obrazuje se iz obaveznih članskih doprinosa članova Fonda u novcu, koje svaki član Fonda plaća u mjesečnom iznosu pod uvjetima, na način i u iznosu utvrđen ovim Pravilnikom.

Novčana sredstva Fonda solidarnosti čine i posebne dobrovoljne uplate članova Fonda.

Uplatom posebnih dobrovoljnih doprinosa u smislu predhodnog stava, ne stiču se nikakva posebna prava u odnosu na druge članove Fonda solidarnosti, koji taj iznos nisu uplatili.

Uplaćeni iznos na ime doprinosa iz stava 1. i 2. ovog člana prestaju biti svojina članova Fonda solidarnosti momentom njihove uplate, i ti se iznosi ne mogu potraživati ni nakon prestanka članstva u Fondu, bez obzira po kojem osnovu je njihovo članstvo u Fondu prestalo.

Član 11.

Sredstva Fonda vode se na posebnom računu RAKTZ na posebnoj, za te potrebe otvorenoj partiji kod njene poslovne banke.

Član 12.

Visina članskog doprinosa za advokate-članove Fonda solidarnosti iznosi minimalno 10,00 (deset) KM a za advokatske pripravnike, advokatske stručne saradnike i radnike RAKTZ minimalno 5,00 (pet) KM

O smanjenju ili povećanju doprinosa iz stava 1. ovog člana odlučuje Skupština RAKTZ.

Član 13.

Član Fonda solidarnosti je dužan redovno i uredno plaćati članski doprinos.

Član 14.

Uplatu članskog doprinosa, član ima pravo vršiti putem banke, pošte kao i neposredno na blagajni RAKTZ, uz obavezu da mu se za izvršenu uplatu izda potvrda, ali u svakom slučaju najkasnije do kraja tekućeg mjeseca za protekli mjesec.

Član 15.

Član Fonda koji ne izvrši uplatu obaveznog članskog doprinosa na način, u iznosu i rokovima određenim ovim Pravilnikom, ne može ostvarivati pravo na pružanje pomoći iz sredstava Fonda.

IV STATUS FONDA SOLIDARNOSTI, UPRAVLJANJE FONDOM I DONOŠENJE ODLUKA

Član 16.

Fond solidarnosti nema svojstvo pravnog lica i djeluje unutar RAKTZ kao poseban organizacioni oblik, sa posebnim novčanim sredstvima, samostalnošću i nezavisnošću u radu, sve u skladu sa odredbama ovog Pravilnika.

Član 17.

Fondom upravlja i odluke iz djelokruga njegove nadležnosti donosi Upravni odbor RAKTZ.

Član 18.

Upravni odbor RAKTZ donosi odluke o svakom pojedinačnom zahtjevu člana Fonda solidarnosti da mu se dodijeli pomoć iz sredstava Fonda. Upravni odbor RAKTZ dužan je o zahtjevu odlučiti najkasnije u roku od 15 dana, računajući od prijema zahtjeva upotpunjenog odgovarajućom medicinskom dokumentacijom, a na način i pod uvjetima predviđenim i uređenim ovim Pravilnikom.

Član 19.

Protiv odluke Upravnog odbora RAKTZ, član Fonda može izjaviti prigovor Predsjedniku RAKTZ u roku od 8 dana od prijema odluke.

Član 20.

Presjednik RAKTZ je dužan u roku od 15 dana odlučiti o prigovoru člana Fonda protiv odluke Upravnog odbora RAKTZ i ta je odluka konačna.

Član 21.

Upravni odbor RAKTZ je dužan redovno podnositi poseban pismeni izvještaj o svom radu u vezi sa Fondom solidarnosti Skupštini RAKTZ, a naročito o broju podnesenih zahtjeva i visini utrošenih sredstava Fonda.

V KRITERIJI ZA DODJELU POMOĆI IZ FONDA SOLIDARNOSTI

Član 22.

Pravo na raspoloživa sredstva iz Fonda solidarnosti imaju pravo članovi Fonda u sljedećim slučajevima:

- a) u slučaju bolesti koja kontinuirano traje od 2-3 mjeseca do 2.000,00 KM,
- b) u slučaju bolesti koja kontinuirano traje od 3-6 mjeseci do 3.500,00 KM,
- c) u slučaju bolesti koja kontinuirano traje duže od 6 mjeseci do 5.000,00 KM,
- d) u slučaju smrti advokata, advokatskog pripravnika, advokatskog stručnog
sradnika i radnika u RAKTZ 3.000,00 KM,
- e) u slučaju trudnoće, advokatici pripada pravo na pomoć za posljednja 3 mjeseca
trudnoće i za prva 3 mjeseca porođiljskog odsustva, ukupno 6 mjeseci, u
iznosima od po 500,00 KM mjesečno.

Član 23.

Članovi Fonda solidarnosti odnosno članovi njihove porodice u slučaju smrti su uz zahtjev za dodjelu pomoći dužni dostaviti Upravnom odboru;

- zahtjev sa detaljnim opisom vrste bolesti,
- relevantnu medicinsku dokumentaciju,
- izvod iz matične knjige umrlih.

Član 24.

Na osnovu dokumentacije iz člana 23. Upravni odbor će donijeti odluku o visini pomoći, ali na osnovu iste medicinske dijagnoze odnosno iste bolesti, pomoć se može dodijeliti pomoć samo jedanput. Ukoliko je došlo do pogoršanja bolesti u odnosu na ranije utvrđenu medicinsku dijagnozu, pomoć se može dodijeliti ponovo, ali najviše još jedanput.

Upravni odbor može, u cilju donošenja objektivne odluke po zahtjevima članova Fonda solidarnosti, angažovati stručnjake iz određenih oblasti radi pravilnog utvrđivanja činjeničnog stanja.

Član 25.

U vandrednim situacijama ukoliko je činjenično stanje nesporno da je član Fonda doživio iznenadnu tešku bolest (srčani ili moždani udar, karcinom) može mu se dodijeliti pomoć u visini do 3.000,00 KM, uz obavezu da u roku od 15 dana dostavi zahtjev i svu medicinsku dokumentaciju kako je to predviđeno članom 23 ovog pravilnika.

Član 26.

Ukoliko član Fonda solidarnosti ne uplati propisani doprinos za Fond solidarnosti za 3 (tri) mjesečna iznosa ne može ostvariti pravo na pomoć iz sredstava Fonda.

VI RASPODJELA I KORIŠTENJE SREDSTAVA FONDA

Član 27.

Iz sredstava Fonda solidarnosti ne mogu se vršiti nikakve druge isplate izuzev isplata koje se vrše u slučajevima i pod uslovima propisanim ovim Pravilnikom.

Član 28.

Sva prikupljena sredstva Fonda solidarnosti isključivo služe za isplatu pomoći članovima Fonda u skladu sa odredbama ovog Pravilnika i u druge svrhe se ne mogu koristiti. Sve troškove, vezane za rad Fonda snosi RAKTZ, koja je dužna staviti na raspolaganje prostorije za rad Fonda, pružiti administrativnu, računovodstvenu i svaku drugu pomoć.

VII PRELAZNE I ZAVRŠNE ODREDBE

Član 29.

Objašnjenja, tumačenja i uputstva za primjenu ovog Pravilnika daje Upravni odbor RAKTZ.

Član 30.

Administrativnu, stručnu-tehničku pomoć, knjigovodstveno-računovodstvene i druge poslove obavljaće Sekretar RAKTZ.

Član 31.

Ovaj Pravilnik stupa na snagu i primjenjuje se počev od 01.09.2021. godine, s tim što je Upravni odbor dužan isti podnijeti na potvrdu Skupštini RAKTZ.

Tuzla, 21.09.2021 godine.



PREDSJEDNICA UO RA/OK TUZLA

Avdibegović Mirna, advokat